

## Kristo Pekee Anatosheleza Madai ya Sheria ya Mungu

**K**wa sababu Mungu ni mmoja, na mpatanishi kati ya Mungu na wanadamu ni mmoja, Mwanadamu Kristo Yesu; ambaye alijitoa mwenyewe kuwa ukombozi kwa ajili ya wote. —1 Timotheo 2:5, 6.

Mwana wa Mungu alikuwa akifuatia katika mamlaka kwa Mtoa sheria Mkuu. Alijua kwamba maisha Yake yenyewe yangetosha kulipia fidia ya mwanadamu aliyeanguka dhambini. Mwana wa Mungu alikuwa wa thamani zaidi kuliko mwanadamu kama tabia Yake ya uadilifu, isiyo na waa na cheo Chake kama kamanda wa jeshi lote la kimbingu vilivyokuwa juu ya kazi ya mwanadamu. Alikuwa katika sura halisi ya Baba Yake, siyo katika sehemu za uso zenyewe, bali katika ukamilifu wa tabia.

Damu ya wanyama isingekidhi matakwa ya Mungu kama kafara inayopatanisha kwa ajili ya uasi wa sheria Yake. Uhai wa wanyama ulikuwa wenye thamani ya chini kuliko uhai wa mwenye dhambi aliyekosa, hivyo zisingeweza kuwa fidia kwa ajili ya dhambi. Ingewezekana kukubalika kwa Mungu kama ishara ya kafara ya Mwana Wake.

Mwanadamu asingeweza kulipia kosa la mwanadamu. Hali yake ya kuwa mwovu, ya kuanguka katika dhambi ingerufanya kuwa sadaka isiyo kamili, kafara ya kulipia kosa yenye thamani pungufu kuliko Adamu kabla ya kuanguka kwake dhambini. Mungu alimwumba mwanadamu aliye mkamilifu na mnyofu, na baada ya uasi wake kusingekuwa na kafara ambayo ingekubalika kwa Mungu kwa ajili Yake, isipokuwa kama sadaka hiyo ambayo ingetolewa ingekuwa kwa thamani, bora zaidi kuliko mwanadamu kama alivyokuwa katika hali ya ukamilifu na kutokuwa na hatia.

Mwana wa Mungu alikuwa Ndiye kafara pekee yenye thamani inayotosha ili kutosheleza kikamilifu madai ya sheria ya Mungu iliyo kamilifu.... Juu ya Kristo hakuna masharti yoyote yaliyowekwa. Alikuwa na uwezo wa kuweka maisha Yake chini, na kuyatwaa tena. Hakuna wajibu aliowekewa ili atwae kazi ya upatanisho. Hii ilikuwa kafara ya hiari kabisa aliyoifanya. Maisha Yake yalikuwa yenye thamani iliyo kamili kwa ajili ya kumwokoa mwanadamu kutoka katika hali yake ya anguko dhambini.

Mwana wa Mungu alikuwa katika umbo la Mungu, na wala hakuona kuwa sio haki Kwake kuwa sawa na Mungu. Alikuwa Yeye pekee, ambaye kama mwanadamu alitembea duniani, ambaye aliweza kuwaambia wanadamu wote, Ni nani kati yenu anayenithibitishia mimi kuwa na dhambi? Alikuwa katika muunganiko na Baba katika uumbaji wa mwanadamu, na alikuwa na uwezo kupitia kwa ukamilifu wa tabia Yake mwenyewe ya kimbingu kulipia gharama ya dhambi ya mwanadamu, na kumwinua na kumrejesha hadi katika hali yake ya awali.

Sadaka za kafara, na mfumo wa kikuhanu wa Kiyahudi, ulianzishwa ili kuwakilisha kifo na kazi ya upatanisho ya Kristo. Sherehe zile zote hazikuwa na maana, wala hazikuwa na nguvu isipokuwa katika kuhusiana na Kristo, ambaye Yeye Mwenyewe alikuwa msingi na ambaye alisimika mfumo wote. Bwana alikuwa amewafahamisha Adamu, Habili, Seti, Henoko, Nuhu, Ibrahimu na watu wengine muhimu wa kale, hususan Musa, kwamba mfumo wa sherehe wa kafara na ukuhani, kwa zenyewe, hazikutosha kuokoa au kutoa wokovu wa nafsi....

Kafara isiyo na kikomo ambayo Kristo aliifanya kwa hiari kwa ajili ya mwanadamu inasalia kuwa fumbo ambalo malaika hawawezi kuelewa kikamilifu (The Review and Herald, Desemba 17, 1872).